



Broj: 04-07-1843-2/10
Datum: 29.4.2010. godine

**BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
DOM NARODA**

BOSNA I HERCEGOVINA PARLAMENTARNA SKUPŠTINA BOSNE I HERCEGOVINE SARAJEVO			
PRIMLJENO: 19.05.2010.			
Organizaciona jedinica	Klasifikaciona oznaka	Redni broj	Broj priloga
02-50-1-16-44		110	

n/r Sekretara Doma Naroda
n/r delegata Alme Čolo

PREDMET: Odgovor na delegatsko pitanje

Veza: Vaš akt broj: 02-50-1-16-44/10 od 9.4.2010. godine u prilogu kojeg je dostavljeno delegatsko pitanje postavljeno od strane delegata Alme Čolo

Poštovana,

Na 44. sjednici Doma naroda Parlamentarne skupštine Bosne i Hercegovine održanoj 9.4.2010. godine, obratili ste se Visokom sudskom i tužilačkom vijeću Bosne i Hercegovine (u daljem tekstu: Vijeće) sa pitanjem da Vam Vijeće odgovori *da li tužioci koji imaju jednu ili više podignutih optužnica koje su završile pravosnažnom oslobađajućom presudom mogu biti kandidati za izbor na više funkcije u sudovima i tužilaštvima Bosne i Hercegovine.*

Povodom Vašeg pitanja, želimo Vas informisati sljedeće:

Vijeće kao jedini organ nadležan za izbor i imenovanje sudija, tužilaca i stručnih saradnika na svim nivoima u Bosni i Hercegovini, izbor vrši na osnovu postupka propisanog Zakonom o Visokom sudskom i tužilačkom vijeću Bosne i Hercegovine („Službeni glasnik BiH“ broj: 25/04, 93/05 48/07 i 15/08 u daljem tekstu Zakon) i odredbama Poslovnika Visokog sudskog i tužilačkog Vijeća Bosne i Hercegovine („Službeni glasnik BiH“ broj: 44/09).

S tim u vezi ističemo da su odredbom člana 21.Zakona propisani opći uslovi za imenovanje sudija i tužilaca i istim nije regulisano da osobe protiv kojih su podignute optužnice i koje su pravosnažno oslobođene od optužbi ne mogu biti aplikanti za sudijske i tužilačke funkcije ili više funkcije od onih na koje su imenovani ukoliko su te osobe na funkciji a članom 34. stav 1. tačka (e) i (f) Zakona je propisano da osoba koja želi da obavlja dužnost sudije-porotnika mora zadovoljavati sljedeće uslove:

- (e) „da nije osuđivana za krivično djelo;“,
- (f) „da posjeduje uvjerenje da se ne vodi krivični postupak protiv nje,“.

Kada su u pitanju sudije/tužioci koji obavljaju dužnost Zakonom je kao jedan od disciplinskih prekršaja sudija/tužilaca predviđen: *osuda na kaznu zatvora zbog izvršenog krivičnog djela, ili ako je sudija/tužilac proglašen krivim za krivično djelo koje ga čini nepodobnim za vršenje dužnosti sudije/tužioca.*

Zakonom je dalje predviđeno, obligatorno privremeno udaljenje od vršenja dužnosti i to samo u slučaju kada se sudija/tužilac nalazi u pritvoru i diskreciono privremeno udaljenje od vršenja dužnosti u slučajevima kada je protiv sudije/tužioca pokrenuta istraga u krivičnom postupku, ako je protiv sudije/tužioca nadležni tužilac podigao optužnicu za krivično djelo i ukoliko je pokrenut postupak razrješenja sudije/tužioca.

O udaljenju sudije/tužioca odlučuje Prvostepena disciplinska komisija i na njenu odluku sudija/tužilac ima pravo žalbe Drugostepenoj disciplinskoj komisiji, odnosno mogućnost podnošenja tužbe Sudu Bosne i Hercegovine.

Dakle iz navedenih zakonskih odredbi proizlazi da ne postoje formalno-pravne smetnje da se osobe protiv kojih su bile podignute optužnice i koje su pravosnažno oslobođene od optužbi, apliciraju za više pozicije od onih na kojima se trenutno nalaze s tim da Vijeće prilikom imenovanja na svaku upražnjenu poziciju u pravosuđu bira kandidate koji ispunjavaju zakonske uslove, vodeći računa i o drugim faktorima koji se cijene prilikom odabira kandidata za koje smatra da su najkvalifikovaniji, na osnovu radnih rezultata, poznavanja zakona i sposobnosti da svoje dužnosti obavljaju profesionalno, efikasno, nezavisno i nepristrasno.

Nadamo se da smo uspjeli da Vam odgovorimo na Vaše pitanje a u slučaju da imate dodatnih pitanja ili su Vam eventualno potrebna dodatna pojašnjenja molimo da nas kontaktirate.

S poštovanjem,



Predsjednik

Milorad Novković